

Cjârs Cunfradis, Autoritâts e Amîs,

us puarti ancje jo cun grant plasê, a non de nestre Societât Filologjiche, il plui cordiâl salût a chest Congrès di Montreâl. Un salût particolâr a chei ch'a vegnin di plui lontan, dal Venit e di Triest, ai rapresentants des istituzions locâls e regionâls, ai reladôrs di cheste zornade, ai colaboradôrs dal Numar Unic e a ducj chei che nus àn dade une man par organizâ te maniere miôr cheste bieles manifestazion.

I numars a son impuartants e propit di numars, anzit di un numar in particolâr, o volevi resonâ. Mi riferîs naturalmentri al numar cent, il numar dai Congrès che di an in an o vin vude la furtune di vivi: no ducj di persone – al mancûl che nol sedi, tra di nô, cualchi centenari – ma come Istituzion. Come ch'ô savês, cent no son i agns de Societât, ch'a'nd à cualchidun di plui, ma il numar di chestis manifestazions, ch'a rapresentin il cûr de nestre ativitât, il moment plui impuartant de riflession che si proponin di fâ su la nestre tiere, la sô storie e il so doman. E dopo cent Congrès o sin rivâts, finalmentri, a Montreâl, une prime volte par un teritori che cussì tant al à dât, une tessare che si merete un puest particolâr tal mosaic dal nestri Friûl. No mi met cumò a contâus lis vicendis dai Congrès e des localitâts che ur àn dât acet, lis occasions che ju àn prudelâts o la furtune editoriâl dai Numars Unics. La storie dai Congrès – e ancje di altris manifestazions – le vin za fate tal volum dal centenari, rincurât di Andrea Tilatti, duncje dal 2019, e a chê publicazion o rimandi. O dîs però magari une peraule su l'atenzion che la Filologjiche e à simpri vût pes localitâts piçulis, laterâls e in cualchi câs periferichis, ancje su la cjarte gjeografiche, se o lin a verificâ, par esempi, che i Congrès *di là da l'aghe* a son stâts plui numerôs – e salacor ancje plui partecipâts – di chei dal Friûl di Mieç. La liste e je lungje: Spilimberc dal 1926, dal 1984 e propit l'an passât, dal 2022, Manià dal 1929, Cordenons dal 1933 e dal 1963, Pordenon dal 1953 e dal 1970, Claut dal 1956, Sacîl dal 1966,

San Vît dal 1973 e dal 2010, Davian dal 1975, Voleson dal 1979 e dal 2013, San Michêl dal 1986, Morsan dal 1988, Vît e la Plêf di Âs dal 1992, Cjasarse dal 1995, Cjanive dal 1997, Cordovât dal 2002, Çopule dal 2015. E vuê o sin a Montreâl.

La reson di cheste atenzion pal Friûl di soreli a mont e diven, par gno cont, propit di une considerazion su la posizion fisiche di cheste part de region, duncje pal jessi a contat diret cul Venit, un contat che nol mancje di vê impuartants efîets su plui di un aspîet de culture locâl, a partî magari propit de lenghe. E di fat la cuistion dal cunfin lenghistic e culturâl tra furlan e venit e torne regolarmentri, no par câs, tai salûts ch'a vierzin i Numars Unics. Il sindic di Cordenons, par esempi, al fevele cun braûre dal so paîs "plantat su i cunfins de la Furlania" e compagn a fasin, cun peraulis simpri claris, i sindics di Sacîl, di Cjanive o di Pordenon. La conclusion e je simpri chê, plui o mancûl, valadî la raccomandazion ae popolazion locâl di mantignî saldis lis lidrîs furlanis par no pleâsi ae pression culturâl dai vicins. Il cjatâsi sul cunfin al è considerât un pericol, disîn cussì, ma ancje un titul di merit: masse facil conservâ l'identitât, masse facil restâ furlans par chei ch'a vivin tal cûr de region, ch'a son mancûl "contaminâts", ch'a son plui lontans, apont, dal cunfin. Chest rapuart cul cunfin, duncje, un cunfin che no si viôt, magari, ma che si sint, un cunfin che ti domande un passepuart par lâ di chê altre bande – e chest lu san benon i nestris emigrants sparniçâts in dut il mont – o ben che ti domande, ancjemò, di metiti a difese de Patrie, come che nus dîs Arturo Zardini propit tal *Salût 'e Furlanie*, il *Cjant de Filologjiche* ("il cunfin todesc e sclâf"). E je vere che in dî di vuê i cunfins no son plui, par furtune, ma l'idee di cunfin e reste part dal nestri sintî, e reste in cualchi forme dentri di nô, part di une cussience di un popul che sigûr la Storie no à vût masse rivuart par lui, che no lu à tratât masse ben. No sai se je vere, ma une buine part dai furlans le pense cussì (ma no jo).

La cuistion da l'identitât e risulde alore di simpri centrâl te azion de Societât Filologjiche Furlane, di ca e di là da l'aghe, identitât che si compon intun cuadri une vore complès di elements, tra storie e ambient, tra culture materiâl e valôrs

morâi, tra lenghe e tradizions; e je un'identitât che si misure a partî dal ricognossiment de pluralitât e de varietât des comunitâts furlanis, une identitât ch'e cres dal bas. Montreâl no je Spilimberc, che nol è San Denêl, che nol è Cividât, che nol è Glemone, che no je Mueç, che nol è Davâr, che nol è Sapade, che no je Tarvis, che nol è Grau, che nol è Acuilee e vie indenant. O sin chi di passe cent agns, fîs di chest Friûl, propit par contâ cheste identitât, il patrimoni plui grant, il tesaur ch'o vin vût in ereditât dai nestris vons e che si proponin di lassâ ai nestris nevôts. Parcè che, o soi sigûr, se o rivassin a cognossi e a preseâ chest patrimoni e chest tesaur, magari par une volte no saressin plui *libars di scugnî lâ*, come ch'al diseve chel, ma *libars (e seneôs) di podê restâ*.

Il Congrès, o disevi, al è il moment plui alt di riflession sul teritori ch'o cirin di fâ. Ma, naturalmentri, no dome di Congrès e vîf la Societât Filologjiche. Nol passe di che no vedin une manifestazion, la presentazion di une publicazion, la lezion di un cors pratic, un incuintri cu lis scuclis, une cunvigne o une taule taronde, un progjet di inviâ e une convenzion di firmâ, un libri di catalogâ, un amì che nus domande alc. Un lavôr tra paîs e personis, memoreant dome cheste setemane Tita Brusin a Aquilee, par esempi, ma ancje Gian Carlo Menis vinars in Mont di Buie, preparant une cunvigne sui 150 agns de publicazion dai *Saggi ladini* di Ascoli, une pierre miliâr pai studis furlans, e presentant i risultâts di une ricercje sociolenghistiche su lis trê comunitâts dal Venet, i furlans di Puart, i ladins di Belun e i cimbros tra Verone e il Trentin. La Societât Filologjiche pardabon e je simpri ative, simpri in moviment, e di chest cetant agrât ur vin ai voluntaris ch'a metin a disposizion timp e passion, al personâl dal Istitût, tes trê sedis di Udin, Gurize e Pordenon. Ma al baste lâ a viodi sul sît internet la rassegne dai event programâts tes prossimis zornadis par savênt di plui, une rassegne che no si ferme mai.

O voi a concludi il gno salût di benvignût cui ringraziaments a chei ch'a àn

lavorât pal bon pro dal Congrès, la zornade di vuê, ma ancje par dutis lis manifestazions che lu àn compagnât ta chestis setemanis culì a Montréal. Par prin lu ringrazii lui, siôr Sindic, pe disponibilitât e pal bon acet che nus à dât, pe colaborazion te organizazion dai events, pe condivision dal progjet editoriâl dal Numar Unic. Cul Sindic o ringrazii dute la zonte, il consei comunâl e dute la strutture amministrative dal Comun.

Un ringraziament di cûr, no formâl, a chei ch’a partecipin a cheste zornade, a partî di pre Luca Crema, ch’al à celebrade la Sante Messe, ae corâl de parochie, ae scuele di musiche Fadiesis, ae nestre Alessandra Piani, ch’e presente il Congrès, a Donatella Cozzi e a dute la Jurie impegnade a valutâ i lavôrs dal Premi Ciceri... e ai premiâts, naturalmentri, par vê partecipât al concurs. L’agrât plui grant di ducj, pardabon speciâl, al è però pai trê curadôrs dal Numar Unic, Aldo Colonnello, Alessandro Fadelli e Paolo Tomasella, che ca di pôc nus presentaran i risultâts dal lavôr lôr, dai lôr colaboradôrs e de segretarie di redazion, come simpri tignude sù di Elena e Alessandra.

Pal an cu ven, tal 2024, o sin a Concuardie, un comun cetant impuartant pe storie furlane, soredut in ete romane e cristiane, ancje li une prime volte pal nestri Istitût. No si fermìn, cjârs cunfradis e amîs, sperant di vê altris bielis zornadis di fieste in famee, come cheste di vuê a Montréal, une fieste par dute la comunitât. Nô o vin la nestre fieste, o discutìn di storie e di culture, o gjoldìn lis bielecis dal Friûl, ma un ultin pinsîr no podìn no vêlu par chei ch’a vivin un moment brut, di dolôr, di soference e di pôre. E cussì a tornin lis peraulis di chê vilote: “che il Signôr al fermi la vuere”, che la pâs pardabon e torni pai popui ch’a scombatin, propit chi dongje di nô, in Europe, e ancje plui lontan, tal mont.

Buine zornade e ogni ben!

Federico Vicario

Dean de Societât Filologjiche Furlane